



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima

tir yimym

TAPAK 7

Man United-i Weghorst den tenangzüktepba yanglu

Iran-i taoba defence ministry ketdangsür ka tasüba agi merenshi



VOL. XX NO. 93 (ADOK 93) DIMAPUR

AMUNGNÜ (SUNDAY)

ANEJETI (JANUARY) 15, 2023

₹ 5.00

## State sorkari election magidang Naga yimten latettsü meranger: CM Rio

**Kohima, January 14, 2023 (TYO):** State assembly elections magidang Naga yimten latettsü atema state sorkari meranger saka ibaji masüadang election agitsü anogo sangdongra Nagaland nung President's Rule marudaktsüsi atema election maparen nung shilem agitsü ta Nagaland Chief Minister Neiphiu Rio-i ashi.

Kohima nung Chiechama Village Dahou (Amphitheatre) lapoktsüba sentong nung CM Rio-i iba osang metetdaksü.

"Election matongdang Naga yimten latettsü asoshi yariteptsü atema NLA nung MLA 60 prong külemi sabang ka nung adenshi aser yimten latetra onoki menden toktsütsü sangoktsüogo" ta pai ashi.

"Election Commission-i Nagaland semdangi arua lir aser parnoki political party tem, ozüing amertem aser sorkar ketdangsürtem den election agitsü dak sendakba sendentem amener. Parnok Delhi-o meyipa aoba sülen election agitsü anogotem metetdaksütsü akok" ta CM Rio-i ashi.

"ECI-i election agitsü osang metetdaksüra temzüng nung aliba ama onoki election nung shilem agitsüsa akümtsü, aji ta mesüra President's Rule arutsü" ta paisa ashi.

"Nagaland nung President's Rule benokra nübertem kanga timtemtsü kechiyong tesüiba nunga asenoki iba tensa ajangshio. PR mapang sepaitemi ketdangsütsü aser parnoki nübertem ola mangar saka MLA temibo nübertem atema jembu aser ozü sorkari Naga yimten latettsü atema akangkanga noktaka lir" ta Rio-i metetdaksü.

ENPO-i Frontier Nagaland akhangba atema Rio-i "2011 nung State Cabinet-i Eastern Nagaland nem autonomous council agütsütsü shio kechiyong

sorkari parnok asoshi bilemstür" ta ashi.

"Naga state lemsashitsübaji Naga nunger ajak külem asüba taginüba anema lir. Naga nunger aliba tesemajak ka akümtsüba ya State Assembly nung tenetben tashi agizükogo" ta Rio-isa shisem.

"Yaküm Nagaland nung CM's Health Insurance Scheme (CMHIS) aser CM's Micro Finance Initiative (CMMFI) tenzükogo aser item ya state sorkar indang scheme tongti ana lir. Anungji nübertem item scheme nungi tajangzüktem agitsü mepishir" ta Nagaland CM-i ashi.

"CMHIS kübok kibong kati küm nung Rs 5 lakh tashi teyaru angutsü aser sorkar mapa MLA o pensioner tem dena sorkar mapa inyakertemi küm nung Rs 20 lakh tashi angutsü" ta Rio-i nenshia ashi.

CMMFI ya state sorkar indang scheme ka lir aser iba ya yaküm August nung Union Finance Minister Nirmala Sitharaman-i tenzüksü.

Iba scheme atema Rs 65 crore lemszüksüogo aser beneficiary tem nem agriculture & allied sector (processing units, MSME, etc dena) subsidy aser interest teyari agütsütsü, ta CM Rio-i ashi.

Tanü sentong nung Rio-i Chiechama Village Council ajanga amphitheatre takok ngua yangluba atema tenüngsang agütsü.

Iba mapatong ya Ministry of Tribal Affairs, Government of India kübok teyari agüja inyakba lir. CM Rio indang constituency Northern Angami-II A/C nung Chiechama ya yimtsüng tulutiba lir aser tesüiba mapang pa tenetben tashi yariba atema pai Chiechama nunger dang pelaba metetdaksü aser taruba election nunga pa yaritsü mepishi.

## KLO tanishir-i Nagaland nung temai adok

**Tinsukia, January 14, 2023 (Agencies):** Kamtapur Liberation Organization (KLO) tanushisang Jeevan Singha (Jeevan Koch Timir Das) Hokolbarnü temai adokogo.

Indo-Myanmar artsü anasa Longwa region nung pai sepaitem tsüngdang temai adok aser Centre o state sorkar den yimjung olemtep nung adentsü imlar.

KLO nung tongti tanishir Kailash Koch aser pa kinungtsü Jugli na temai adokba sülen ita pungu lir Jeevan Singha temai adokogo. Kailash aser pa kinungtsü nati Kolkata nung West Bengal DGP tsüngdang temai adok.

KLO ya 1995 küm tentet aser iba nung Koch Rajbanshi nunger züngsema lir. KLO-i Cooch Behar, Malda, North Dinajpur,

South Dinajpur aser Jalpaiguri district tem nungi shilemtem agiteta state balaka tentettsü akhanger.

KLO tanishisang Singha-i Nagaland nung Assam Rifles tsüngdang temai adok ta osang angazükur.

Singha-i Assam aser West Bengal nung KLO maparen aika nung shilem agiogo aser lanur noklang aika nem arms training agütsüogo ta osang ajanga ashi.

Singha-i aniba telok ka Myanmar nung parnok jenoka aliba tesep nungi Nagaland kübok Mon district-i aru aser parnok Delhi-i ogo ta central intelligence agency ketdangsür kati ashi.

"KLO teloki 27 Assam Rifles tsüngdang temai adok aser iba sülen Delhi-i ao. Iba maparen ya miima dang inyak" ta paisa ashi.

## Nagaland nung kechi südir süaka assembly elections agitsü: ECI



January 14, 2023 nü Hotel de Oriental Grand, Kohima Chief Election Commissioner, Rajiv Kumar-i anir Election Commission of India ketdangsürtemi osangbener senden ka amenba angur.

**Kohima, January 14, 2023 (TYO):** Election magidang Naga yimten latettsü aser election nung shilem magitsü onüktem liaka Linük temzüng nung lateta aliba ama ECI-i Nagaland Assembly elections agitsü ta Chief Election Commission (CEC) Rajiv Kumar-i ashi.

"Takhangba balala liaka onoki elections agitsü aser iba ajanga Naga yimten maparen nung timtem kecha mali" ta CEC Rajiv Kumar-i ashi.

Naga civil society temi State election magidang Naga yimten latettsü takhangba agütsür aser külen Eastern Nagaland Peoples' Organisation (ENPO)-ia parnok nem state balaka magütsüra election nung shilem magitsü ta ashir.

Nagaland State Assembly indang kümsük ya March 12, 2023 nü tembangtsü aser Indian Constitution nung kümsük metembang dang election agitsü lateta lir. Anungji election magira khuret aika ajurutsü, ta CEC-i ashi.

"Election Commission ya Constitution kübok elections agitsü atema tentetba lir aser onoki Nagaland assembly kümsük matemdangsa elections

agitsü" ta paisa metetdaksü.

Osangbenertemi Nagaland state election kodang agitsü ta asüngdangdang "Northeast nung state asem- Tripura, Meghalaya aser Nagaland nungi osangtem metetpelar aser iba sülen onoki senden ka mener election agitsü anogotem osang sangdongtsü" ta Rajiv Kumar-i langzü.

Nagaland nung voters-i democracy tangatetba nung state assembly elections nung shilem agitsü ayongzüker, ta paisa ashi.

Nagaland Legislative Assembly menden 60 lir aser voters 13,09,651 lir. Parnokji tebur 6,53,616 aser tetsür 6,56,035 lir. Special Summary Revision agiba sülen January 5 nü electoral roll sayaba nung voters 44,736 bendenlokogo, ta CEC-i ashi.

Nagaland nung service electors 7,981, Persons with Disabilities (PwDs) 6,970 aser arishi küm 80 tema senior citizens 36,403 aser parnok rongnung centenarians (100+) 1,675 lir. Nagaland nung tang mezüng voters (arishi küm 18-19) 30,049 lir, ta paisa metetdaksü.

Nagaland nung polling stations 2,315 lir aser itemji

urban nung 531 aser rural nung 1,784 lir. Maneni, PwD managed polling stations 10 aser women managed polling stations 196 lir. Polling station 1,650 tashi webcasting kübok adentsü, ta Rajiv Kumar-isa ashi.

Election Commission-i PwDs aser Senior Citizens atema facility renemba dak alia cVIGIL mobile app tenzükogo. Iba app ajanga ken o ka benokba sülen minute 100 tsüngda telangzüba agütsütsü, ta paisa ashi.

EC-isa Voter Helpline App sayaogo aser iba ajanga Electoral Roll nung tenüng reprangtsü mesüra polling booth osang metettsü akok, ta paisa shisem.

"Election Commission-i election tiptema agitsü aser nübertem longsoa shilem agitsü atema mapa inyaker. Political party kari Electronic Voting Machines mamshii ballot papers amshitsü shio saka ibaji tamakoktsü" ta CEC Kumar-isa metetdaksü.

"Political party tem aser candidate temi EVMs ayuba tesemtem reprangdangtsü atema teshimtet nübotem yoktsü akok. 24/7 CCTV surveillance aser three-tier security kübok EVMs ayutsü" ta paisa ashi.

## NSCN-IM aser NNPG külemi yaritepa yimten latettsü



**Dimapur, January 14, 2023 (TYO):** Naga yimten tebilemstü atema inyaka aruba maparen nung Honibar nungi mera tasen ka nung ayaogo aser ibaji NSCN-IM aser NNPGs külemi yaritepa yimten latettsüba lir.

September 14, 2022 nü "September Joint Accordant" agiba sülen January 14, 2023 nü NSCN-IM aser NNPGs külem sangdong ka agütsüba nung 'Council of Naga Relationships and Cooperation' tentetba shia lir.

Iba mapa ya Forum for Naga Reconciliation (FNR) ajanga

yaritepa inyak aser NSCN-IM o NNPGs külemi yaritepa tekaratiba nung Naga nunger tejakleni aotsü atema lenmangtem bushitsü bangjemtepo.

Iba sangdong nung NNPGs Convenor N Kitovi Zhimomi, aser NSCN-IM Chairman Q Tuccu nati sign süa lir.

"Tanü NNPGs aser NSCN ajanga onok külemi India sorkar den Naga putiotsü aser yimtenren temetentem atema yaritepa inyaka aotsü nangzüker" ta sangdong nung shia lir.

"Asenok külem senmang talila melemsadaksütsü atema

onoki Naga nunger dang onok den külemi noktaksü mepishir" ta NNPGs aser NSCN-i metetdaksü.

"Naga nunger tejakleni aoer aser Naga Naga movement nung timtem ajurudang Naga nungeri item ajak teti ajangdanga aruogo" ta parnokisa ashi.

"Naga nunger külem tarutsü atema onok longjemtsü ayongzükbaba angashia onok külemi lokteper" ta NNPGs aser NSCN ajanga nung 'Council of Naga Relationships and Cooperation' tentetba sangdong nungsa shia lir.

### LSU-i ayongzüka household waste segregation campaign sentong agi



January 14 nü Household waste segregation campaign sentong nung ketdangsürtem aser shilem agirtem tangokba noksa nung angur.

**Dimapur, Aenjeti/January 14 (TYO):** Lhisemia Students' Union kum 75 ajungba nüngdem nung L.Khel, Kohima Village nung Household waste segregation campaign ka tenzüko.

Iba sentong ayongzüka agiba nükjidong tongtibangtibaji, Lhisemia khel nung aliba kibongtem ajak nem pei kidang nungi tenzüka jana bendanga bendentsü (waste segregation) aser janatem treatment plant tonga bener aotsü koda tongtibang iba indang tangazükba agütsüsü asoshi lir. Iba den jana mashi mashi nung bendenba, arongba aser biodegradable aser non-biodegradable janatem tesem ka nung dang bendenba

nokdangtsü asoshi tangazükba agütsüsü atema iba sentong ayongzüko.

Lhisemia council züngsemtem, Lhisemia Youth organization ketdangpurtem, 75buba LSU anniversary organising committee züngsemtem, LSU sanenluden züngsemtem aser kaketshir 100 shi-i iba sentong nung shilem agia liasü. Iba sentong ya "With one mind...towards a healthier environment" omen nung jemdaker agi.

Lhisemiapfü Mechü krotho (LMK)-i sentong nung shilem agirtem atema süngojemtsü anepaluja liasü.

Iba campaign ya Khel nung aliba nüburtem tenüng nung Lhisemia Council chairman

Ayie Yhome-i tenzüka liasü.

Sentong nung shilem agirtemi L.Khel ya jana kanga junga bendanga bendenba aser intokba kiyong ka kümdaktsüsü aser sentong yanglur aliba mapa küma benoka inyaksangshitsü atema tenangzüka ka agia liasü.

Iba sentong ya organizing committee co-convenor Khriesazo Liezietsu lenisüba nung agi aser organizing committee züngsem Vitsu Yhome-i campaign ayongzüka agiba nükjidong lemsatapa liasü. Maneni Khedi Baptist Church deacon Kekuolhouthie Dziivichii-i Tsüngrem temaotsü meshizüka sarasadema liasü.

### 33buba Jakhama Village Day Jan 16 nü amungtsü

**Dimapur, Aenjeti/January 14 (TYO):** 33buba Jakhama Village Day sentong January 16 nü Champion School Ground, Jakhama yimtsüng nung amungtsü. Iba sentong ya "TRUTH and VICTORY" omen nung ajemdaker amungtsü.

Iba sentong nung Retd. Project Director DRDA, Govt, of Nagaland Podi Sophie tiongti o jembir asütsü.

Village Council chairman Zhopo Richa-i ashiba agi, iba sentong ya mezüngbo Village Council Hall nung amungtsü renemer liasü, ajisüka tesem mesüraba ajanga Champion School Ground, Jakhama village nung amungtsü atema telemtetba agia liasü.

Sentong nung Pastor JCRC John Zao-i Tsüngrem temaotsü

meshizüka sarasademsü aser iba sülen lokti pela agizükba o, sobaliba ken aser tanga western kentem atentsü, osang agiba mapang alitsü aser nisung kari o jembiba sülen VDB Secretary Sahovi Richa-i tepela o jembitsü, ta kasa sangdong ajanga metetdaksü.

Advocate Kezhokhoto Savi-i ashiba agi, Jakhama Village Council temzüng ozüng/YEHZABO nung kümschia January 16 nü ya yimtsüng anogo ama amungtsü lateta lir, kong Jakama nung tanur tain, yimtsüng nung aser bendanglen alirtem aser talisa Kohima aser Dimapur nung alirtem adenshia tali tangatetep nung longjemshir aser yimtsüng nung tientet rogotemi Tsüngrem tsübu kong lidir liaka yimjung nung alitsü aser tangar dang tajung

benshitsu, lokti ajangzükdaktsüsü atema takoker kaka akümtsü aser yimtsüng nem tenüng menük masü saka tenüng tajung bener arutsüsü atema inyaktsü ajungshir, ta ashi.

Iba anogo nüburtem dang Village Council temzüng ozüng akümtsübuttsü atema nenshia metetdaksür, kong aluyimba mapang fertilizermamshitsü aser organic chiyongtsütem dang ajungkettsü atema tetuyuba agütsür aliba amala densema lir.

Maneni Savi-i, JVC temzüng ozüng benoker taküm küm 30 ajunger aser 2023 küm May 1 nü küm 30 abensatsü, kechiyong mezüngbuba temzüng ozüng ya 1993 küm May 1 nü agizüka liasü, ta metetdaksü.

### Angh aser NSCN/GPRN-i Sökrönye benjung salem lemsatep

**Dimapur, Aenjeti/January 14 (TYO):** Nagaland aser Assam Angh Prof. Jagdish Mukhi-i sangdong ka ajanga Chakhesang nungertem den Sökrönye benjung salem lemsatepogo.

Sökrönye ya aluroba benjung ka lir aser iba tebur tajung benjung amungba mapang Chakhesang nungertem meshiteta aser merekteta amunger. Benjung dak sendaka aliba inyakyimtem ya pei tanüla meshitetsü asoshi lir aser benjung mapang tanurtemi tamangba yimsü aser sobaliba inyakyim balala angazüker.

Iba benjung amungba mapang ajak tekümsükba nung platepa amungtsü imlaja atar.

Tsüngremi Nagaland Moajang, ta Angisa kasa sangdong ajanga lemsatep.

Kasa mapang nung NSCN/GPRN-ia, Chakhesang nungertem den benjung salem lemsatepogo.

Küm tasen agizüka Sükrönye benjung ya amunger, kong aiür aser asangur chanutem tamangba yimsü inyakyim balala ajanga meshitetsür.

Benjung amungba den peta Chakhesang nungertem maneni tarutsü nung yimji yimjung nung aotsü aser Naga nungert tsüngda yimjung ajungketer kaka akümtsü imla atar," ta NSCN/GPRN (Akato Chopi) MIP sangdong ka ajanga metetdaksü.

### Assam Rifles-i sentong balala ayongzüka agi



**Dimapur, Aenjeti/January 14 (TYO):** IGAR (North) kübok Assam Rifles Jalukie Battalion-i, Peren jila nung January 14 nü Christian Serventhood Ministry Orphanage Home nung lanurtem tarutsü career atema awareness lecture sentong ka ayongzüka katsüogo.

Iba lecture sentong ayongzüka agiba nükjidongji career atema maongka balala aliba, Linük yangerba nung lanurtem shilem, career atema sentong yanglutsü, lanurtem atema career shimtsü asoshi mapa balalatem indang tangazükba agütsüsü asoshi liasü.

Kasa mapang Assam rifles-i, kaketshirtem education, training aser talisa recruitment tatidang balala atema tetsürtem nem coaching agütsüba aser lenla balala nung parnok sempet arangtshitsüba indang parnok nem metetdakja liasü.

Iba sentong nung kaketshir 16 den Orphanage Home staff temi kanga jangrabangra shilem agiogo.

Kasa mapang nung Assam Rifles Ghaspani Battalion-i, Chumukedima district kübok Kukidolong yimtsüng nung Water harvesting atema water supply system agütsüogo.

Yimdaklirtem tzü bendenba nung teyari agütsüsü atema AR-i AR CAP Project 2022-23 kübok Kukidolong yimtsüng nem 2 x 5000L Sintex, 1 x 1.5HP pump, 110M Pipe, aser Electric wire agütsüba liasü.

Water harvesting system atema AR-i agütsüba osettem ya Village Chairman, GB aser tanga Council züngsemtemi yimdaklirtem tenüng nung agizüka liasü.

Maneni Assam Rifles Dimapur Battalion-i, Doyapur village ground nung January 14 nü tetsürtem atema friendly Volleyball asayamung ka ayongzüka asayadaktüsügo.

Doyapur, Daniel Basti, Khekiho aser Hazadisa yimtsüng nungi tetsür team temi iba asayamung nung shilem agia liasü. Asayamung ya Knockout yimya nung Doyapur V/s Hazadisa aser Daniel Basti V/s Khekiho asaya aser final asaya Khekiho adser Doyapur na asaya, koba Khekiho yimtsüngi koka liasü.

Yimtsüng ajak nungi Head GB temi iba sentong tajung ayongzüka katsüba atema AR dang kanga pelaba lemsatepba sülen sempet agütsüba mapang agia liasü.

### Tuensang nung election atema consultative senden amen

**Dimapur, Aenjeti/January 14 (TYO):** Nagaland Legislative Assembly atema taruba general election agitsü aliba dak sendakba nung January 14 nü DC Conference Hall, Tuensang nung consultative senden ka menogo. Iba senden ya ADC Tuensang, Thungchanbemo Tungoe lenisüba nung agia liasü.

Senden nung election inyakyim atema nongloktsür aliba nodal officer temi temzüng ozüng aser nübu achaayangtsü, senzüsenpongtsü, EVM achaayangtsü, sen intokba

asadanga alitsü atema sensak asem. Parnokisa election inyakyim nung media, tashishibattem bentetsü koda tongtibang aser voters helpline aser general election atema SVEEP campaign indang sensaksema liasü.

Maneni Tuensang ADC-i officer tem dang election inyakyim metembang tashi pei tata tesem toktsür maotsü mepeshia metetdaksü. Iba seden nung election nung mapa balala atema shimer aliba nodal officer tem ajaki shilem agia liasü.



January 07, 2023 nü Akumen nung Ayu Longchar Farmer Producer Company Limited office lapokba sülen tangokba noksa nung angur. Iba office ajanga area nung süngo lu ayimertem nungita yaritsü.

# MULUNGNEN O



Late Dr. Imtiwapang Aier  
22.01.1973- 07.01.2023

Nagaland Legislative Assembly nung taoba Speaker aser 23 Impur Assembly Constituency nung MLA Dr.Imtiwapang Aier'er kibongi onok mangyim jashi tia nung alidang, maparen tapu aika nung onok dang meima yariteperitem ajak dang kanga pelaba metetdaksür.

Onok tsungdong arua yariteperitem, mang anükertem, asüpila sentep sentong nung adenertem, leper tashi mang bener meinoktsürtem aser iba ama timtem tulu ajuruba mapang shisatsü aser nübo agi yariteper kinunger adianutem, kidang kiyonger aser temeimertem ajak den onoki kanga pelaba mulungnen o ka yangi lemsateper. Ano telephone agi mulung sünepja jembirtem, len talang jajaa meinoktsürtem, nara, card aser message yoka mangyim jashi lemsateperitem aser ano shirnokisa rongsen agi onok dang meima yariogo, nenok ajak dang onoki kanga pelar.

Shirnoki sarasadem, nübo aser rongsen agi maparen tapu balala nung yaritepogo, nenok teyari agi onok mulung anisungzük tuluka nguogo. Onoki nenok nisung shia dang pelaba ashitsüji tamakoktsü asünungji, iba mulungnen o ya nenok ajak den onoki kanga pelaba lemsateper ta agizükdaksüner.

### Talisa onoki item dang ya pelaba shisemer :

- Governor, Nagaland
- Chief Minister, Nagaland
- Dy Chief Minister, Nagaland
- T.R. Zeliang, Chairman UDA
- Speaker NLA
- Members of the Nagaland Legislative Assembly
- Commissioner of Police Dimapur
- SP Kohima & Mokokchung
- Deputy Commissioner, Kohima
- Sungratsü Senson Senden
- Sungratsü Baptist Arogo
- Sungratsü Students Union
- Sungratsü Students Union, Dimapur
- Sungratsü Union Dimapur, Kohima & Mokokchung
- Sungratsü Village Council
- Sungratsü Gazetted Officers
- Kohima Asetkong Senso Telongjem
- Asetkong Senden
- Asetkong Kaketshir Telongjem Mungdang (AKTM)
- Village Council (Longjang, Mopungchuket, Longpa & Chami)
- Upper Forest Colony Ward Authority & Youths

- Ungma Village Council
- KABA
- DABA
- Ngati Baptist Arogo
- Tuophema Union, Dimapur
- Aoer Legislaters Forum
- PCCF & Staff
- Ambulance CMO, Dimapur
- Nkialwa Village, Azailong Village,
- Nbaupungwa Village and
- House of Prayer for All Nation

- Temeim Kinungtsü, jabaso aser jalatem.

## 2024 elections nung Regional Parties-i tongti shilem agitsü: Amartya Sen

**New Delhi, January 14 (Agencies):** Economist aser Nobel Prize Award angur Amartya Sen-i, 2024 küm general elections nung regional party temi tongtibang shilem agitsü, ta ashi.

Kolkata nung interview ka nung jembidang Sen-i, 2024 küm general election atema asemteperji Bharatiya Janata Party (BJP) dang asütsü ta mebilemetsüla, ta ashi.

Sen ya Narendra Modi-i aniba Centre sorkar aija arur ka lir aser pai ashiba agi, taruba general election nung regional party aika tongtibang asütsü.

Paisa, Trinamool Congress (TMC) tongti, Mamata Banerjee ya Ato kilonser asütsü temsüa lir, ajisüaka BJP anema lai party tem longjemdaksütettsü asü masüar mejangja, ta ashi.

"Regional party aika kanga tongtibang. DMK ya tongtibang party ka, TMC-a kanga tongtibang aser Samajwadi Party (SP)-a tongtibang," ta pai ashi.

1998 küm Sen nem Nobel Prize in Economics agüja liasü.

Opposition lenirtem aikati longjem BNP den tokteptsü atema jembiba mapang ka nung Sen-ia iba o ya jembir. Nationalist Congress Party (NCP) aser Janata Dal-United (JD-U) densema party balala nungi lenirtemi taruba Lok Sabha election nung opposition longjem BNP den tokteptsü atema jembir.

Sen-i, "India atema BJP mangdang kanga ajema kümogo. India atema parnok tangatetba ajema iba ya Hindu linük aser Hindi oshi jembiba India ta züngshir , anungji tanü India nung BJP den tokteper melira tejashitsüka asütsü," ta ashi.

"BJP ji tashitait aser tashi tulu lir ama reprangtetra, iba nungji tashimait-a lir. Anungji tanga yimtenren party temi merangra parnok den tokteptettsü," ta pai ashi.

Mamata Banerjee taruba Ato kilonser akümtsü akok asü?, ta asüngdangba langzüdang Sen-i "La Ato kilonser akümtsü temsüa lir. Ano külen Mamata-i BJP anema party tem longjemdaksütettsü aser la lenir asütsüsa lai inyaktettsü asü meinyaktettsüar tang tashi nungbo mejangja," ta ashi.

Mamata Banerjee-i aniba

TMC, K Chandrashekar Rao-i aniba TRS, aser Arvind Kejriwal-i aniba AAP party temi 2019 küm election atongtsü anasa Federal Front (FF) tenteta liasü.

Mamata-i Kolkata nung ayongzükba senden nung adenertem rongnung JD(S) lenir aser taoba mapang Karnataka Chief Minister HD Kumaraswamy, taoba mapang Ato kilonser HD Deve Gowda, Arvind Kejriwal (AAP), taoba mapang UP nung Chief Minister Akhilesh Yadav (SP), MK Stalin (DMK), NCP tongti Sharad Pawar, Jammu & Kashmir nungi Omar Abdullah aser Farooq Abdullah nung dena liasü.

Sen-i, Congress tashi meiti kümogo anungji 2024 elections nung parnok takok mangutsüa akok; iba dak alia Congress telung nung telemsa adoka lir, ajisüaka India tesem ajaklen mangdang sayutetba party jibo Congress dang asütsü, ta ashi.

Taoba mapangtem nunga Sen-i Modi sorkar aiben aija aruogo.

2018 küm Sen-i, 2014 küm nungi tenzuka India-i lenmang tai nung ajemokogo, ta jembiba liasü.

Iba mapang nungji Sen-i, "2014 küm nungi lenmang tai nung ajemokogo. Rongsenketzung tekaratiba ainba linük nungi asenok tesülen atsüngzük," ta jembiba liasü.

2020 küm nunga Sen-i, linük nung o lemteptsü aser melung masüba ola adoktsü atema lenmang mesü-a kümogo, kong ken o mangadangi tepuokdak ayur, ta jembiba liasü.

Aluyimertemi aluyimba ozüng tasen asem anema longkak aitba mapang nunga pai aluyimertem pusema liasü. Tesüsa sorkari item ozüng asemprong agien.

Sen-i, "Sorkari mesaklokba nisung kaji sorkari kiralongrar, ta sangdonga tepuokdak ayur. Nüburtem longkak aittsü aser o lemteptsü maangka aika nokdangogo. Melung masüba ola adoktsü aser o tokteptsü atema lenmang mesü-a kümogo. Linük anema inyaker, ta aija ken o mangadangi tepuokdak ayur," ta metetdaksü.

1999 küm Atal Bihari Vajpayee-i aniba BJP sorkari Amartya Sen nem linük nung tematiba civilian award- Bharat Ratna agüja liasü.

## Bharat Jodo Yatra nung shilem tagidak mapang Congress MP, Chaudhary asü



January 14, 2023 nü Jalandhar nung Congress lenir, Rahul Gandhi-i Congress MP asür Santokh Singh Chaudhary'er kibong züngsemtem ajurudang tangokba noksa nung angur. Honibarnep Bharat Jodo Yatra nung shilem agiba mapang pa temelungjang tashidak agi asü.

communications, Jairam Ramesh-i, "Meimlai ajungbena Jalandhar nungi party MP Santokh Singh Chaudhary asüba ajanga asüng (Amongnü) Rahul Gandhi-i osangbenertem den jembitsü aliba sentong thiner aser January 17 nü Hoshiarpur nung ang pai osangbenertem den jembitsü," ta metetdaksü.

Pa asüba osang angashia Congress Tir, Mallikarjun Kharge-i twitter ajanga, "Anojungi ozü MP,

Santokh Singh Chaudhary asüba osang angashia aoksar aser jashir. Pa asüba ajanga party aser organisation akoksatsü. Iba ama mangyim jashi mapang nung ni par kibong, medemer aser pa sapurtem den mangyim jashi lemsateper. Asür tanela tesünep nung anisüngzükdajakjang ta sarasademtsür," ta lemsatep.

Iba dak alia Punjab Chief Minister Bhagwant Mann, taoba mapang Punjab chief minister Amarinder Singh, Lok Sabha Speaker Om Birla aser SAD Tir Sukhbir Singh Badal nung den semema party balala nungi lenir aikati mangyim jashi lemsatepa asür nem akhüm agütsüogo.

## Ludhiana, January 14 (Agencies):

Honibarnü Jalandhar nung Bharat Jodo Yatra nung Rahul Gandhi den külemi shilem agiba mapang Jalandhar nungi Congress MP, Santokh Singh Chaudhary temelungjang tashidak agi süogo. Iba sülen party-i Bharat Jodo Yatra thinen aser Rahul Gandhi-i osangbenertem den jembitsü aliba sentonga thinenogo.

Arrshi küm 77, Santokh Singh Chaudhary-i Rahul Gandhi den külemi Bharat Jodo Yatra nung

shilem agia jajaba mapang temelungjang tashidak atua ali nung ondaka lao. Idangyongjisa pa Phagwara nung aliba hospital kati anir ao, saka pa tasü bener aru, ta doctor-i metetdaksü.

Punjab Congress Tir, Amarinder Singh Raja Warring-i, MP Chaudhary den tatembangbuba asüpila sentong Amongnü agitsü aser Amongnü tashi Yatra thiner, ta metetdaksü.

Twitter ajanga Congress general secretary in-charge



January 14, 2023 nü New Delhi nung Armed Forces Veterans Day anogomong nung National War Memorial nung Chief of Defence Staff General Anil Chauhan, Chief of Army Staff General Manoj Pande, Chief of Air Staff Air Chief Marshal VR Chaudhari aser Chief of Naval Staff Admiral R. Hari Kumar nungeri asürtem nem akhüm agütsüba noksa nung angur.



## TIR YIMYIM YIMOBILEM (EDITORIAL)

DIMAPUR AMUNGNÜ, AENJETI (JANUARY) 15, 2022

### Tezüdang aser anibelem

**A**senok Khristan-bo Khristan saka Khristan ka ama alitsüba taküm ya tezüdangtsüka amai bilemra aser joko amanga-amanga sentepia mounür, sarasadema mesüner, Tsüngrem o bushitsübo otsü maka aser arogo nem tenla agütsüsbaji teindok amai bilemra ta tanüla nung lulaba mapang ka ajurua lira, ibaji asenoki Yisu dak masü saka tamangba yimsü dak amangba ajanga lir ta angatetdi. Asenoki Tsüngrem dakbo amanger ama saka asen taküm mapa aser mulungsentsü ajak agibo mamangtetter ta tanüla taküm nung terata aser tezüdang ajura lira, ibaji asenoki tamangba yimsübo agizük saka Tsüngrem den tesendaktepbo meyanglu ta aliba ajanga asütsü. Yisu Khrista alima nung aliba mapanga yimsü dak ketasena amangertembo aika liasü saka parnok jagi Tsüngrem dak masü Mosa dak dang amang. Iba amaji, ashiko, tanüla asenok tamangertem aika Yisu dak masü saka pastorbak dak mesüra arogo nung tenzükerkem dak amangba ajanga tanüla nung tezüdang atsüngzüka oa alitsü akok. Iba amaji asenok kar tanüla nung aniseter, joko sentepia mounür aser sarasadema mesüner ta tezüdanga alirtem dang Yisui ashir, " Nenok tebelemer aser khuret agi nenneter shisabolua alir ajak kü dangi arung, ne nenok nem anisüngzük agütsüdi. Nenoki kü süngra apuang aser kü dang nungi angazükang, kechiaser ni ajemalu aser kü mulungsentsü anükanüker aser nenok tanüla asoshi anisüngzük agütsü." (Mathi 11:28-29). Atangji, kodang asenok belemba aser khuret abenba indang kari shidir, jet ta asenok anogo shia mapa inyakdak asen temang shi belemba aser aser asen kibong khuret abenba indang temulungjangi arur. Atangji, iba asoshijia Tsüngrem teyari nüngdaksü saka Yisui ashiba yabo asenok shi nung belemba aser khuret abenba indang ashirba masü saka tanüla nung aniapongba aser khuret abenba indang ashir. Asenoki Tsüngrem dak jungjunga amangner saka makoker, anungji arogo nungera masü aser limapur-a masü ta kumadoker. Asenok taküm aser kibong nung tangari manguba aser tangar dang meshitetba khuret aika lir. Iba jagi asenok tanüla nung tipmatemer aser temulung animesüngzüketter. Iba ama shisabolua tezü atangba mapang, Yisui ashir, tangar dangi masü " kü dangi arung." Aji oda, asenok shi nung tezüdanga shisabolua dang mulungdok medemer ka bushia oagi sensaksemba ajanga mulungsüngzük angu ama, asenok tanüla nung tezüdang aludang aser teimla samaa oa alidang Yisu bushia arung, Pai tanüla nung anisüngzük agütsüdi ta ashir. Shi nung anibelemba yabo ayipjanga khen amui ao nung jungadoksü mesüra pain killer mozü ka achi nung anenadoker. Ajisüaka, tanüla nung timatemba yabo Tsüngrem tanüla dang jungtsütsü. Atangji, asenok aika Tsüngrem tenzüka mapa nung kanga belemba inyaker saka melamelaa aniadoker, kechiyong asenoki aiben Tsüngrem mapabo inyaker saka Tsüngrem dangi maor. Asenoki Tsüngrembo tenzüker saka Pa dang masüngdangi inyaker, iba jagi asenok tashi mangur. Asenok aikati Tsüngrem tenzüka mapa nung meinyaknüseti tezüdanga inyaker, iba jagi aseni inyakba mapa ajanga tepela agütsü melen khuretang kumadoker. Iba tia nung asenok kar danga anibelemmer ojang amangdi, ojang inyakdi, ojang aremzükdidi, ojang atadi, ojang tenzükdidi mesüra ojang sarasademdi ta bilema lira, Yisui ashiba o ya tama aser Pa dangi orr asen khuretji shiang, Pai asen khuret pongbatsütsü aser asen tanüla nung anisüngzük tepela angütsüsa Pai asenok nem tesünep agütsütsü. Yisu alima nung alidanga anogo shia shi nung aser tanüla nung khuret abenba lokti tulu den dang Pa jaja aser anibelemba akümdang, Pai telok toktsür tebu Tsüngrem bushia oagi amang piyonga sarasadem. Idangji tebu nungi Pa tashi tasen aser tesünep angu. Iba kasaji asenoka kodang tanüla nung anibelemdir aser asen asoshi dang masü saka tangar asoshia dena tanüla khuret bendir, Yisu dangi odi, Pai asenok nem anisüngzük tepela agütsütsü. Yisui agütsüba tepela, tesünep aser anisüngzük amabo asen taküm aser kibong nem shingaia magütsütettsü.

## OLEMSABANG

### TSÜNGREM TENZÜKER DR. & REV. IMO AIER!!

~ S.Nuken Longkumer, Naga United, Dimapur

Naga lima Ao kin nungi tashitemetetter zünger mezüngma moatsüogo Tsüngrem tenüng sangdi!! Yamaji Rev. Imo Aier ya Longjang yimti nungi lir. Mezüng Nagalima Chief Minister akümsang yimti aser Wapong tajung aika adokogo, Rev. Imo Aier ya Ao kin nungi mezüngpur rongnung tensema sotetta missionary kipong ka, otzü kodang repringdir par kipong U.S.A lima tenzüka senzüba otzü azüngdang tekolok aser temulungjang ajak arakzüdaksür!! Alima tepur tajung otzü dang masü saka America nunger otzü aika rajemtsüogo, tanü putu den putepa nungtugo Tsüngremer osang abener Dr. Clark aser par kipong Naga lima amang tia nung alidang tzüimsa tzüim ajanga ita 6 sür anogo 17 tashi tzüim tulu ajanga aruba bilemtetdaksür? Koda tesüngmangtsü aser temenungratsü otzü tem ajanga temulung raksar?? Tanü putu asenok tamangertem koba tia jenjang nung jajateper? Ken repringdi, missionary aser Tsüngrem tenzüker ita sen nung tenük masünger!! Car tajung aginür? Ki tajung alitsüla, kechiba khristan mainer asenok mapa majung lir? Tezü nung alirtem anitentsü memelunger?? Takar aser tulurtem dang kodaki aotsü aritepa putu? America nungeri sayutetba semchirtemi Imo Aier America lima Tsüngrem O tulu jembia senzü dang parnok benlatepa benjungtepbaji nüklai arudaksür!! Missionary Rev. Imo Aier proka yutsüba mechijong tajunga aika bendentsü repringang tejen putu Tsüngremi Ao kin dang itamasa osang tajung sangoktsüogo!! Tanü asen Aor majung ta jembia yonga tarendaksü kecha mali, ali telung nung süngjang rema lir, tanaben meitsüsa?? Anungji tsübuba teli Israel chir ama Tsüngremi anitsü, iba Tsüngrem O yabo kodanga sama-a maotsü meimchirtem, chubayimlitem sama-a oadoktsü, alima jangratemtsü süitema taor!! Tanü Asen Aortemi sayutetba kin kari anema inyakra jembira tia maka parnoki süngjang tanang mangutsü. Asen tsüraburi mapa tajung inyakba asen chirtem alima sünga lir?? Rev. Imo Aier kipong otzü nungi jangratemtsü aika ajangzükogo. Nokinketer missionary arishia moajangma. Mapang talangka ogo S.C. Jamiri yamai ashiba bilemteter!! Alima tesem balala nung azüngertem dang yamai ashi nenoki topic tenzükdang alima jangratemtsü otzütemang tamasa jembir, iba sülen Tsüngrem chir Yisu atemabo tatem len tera jembir onük tempanger!! Yisu shia aruba sayatenya kong meima ayu? Iba jagi alima ajunga nung khristan ya mainer ta ashi, kechiba Yisu shia aru laishiba kuli lir, asen tenük agi mangu saka kodanga shizüka maoba Tsüngrem O nür kipong den lir aser tenük agi manguba mesentena lingo ta ashiba mamar?? Iba otzü ajanga yipru mepong ama timtem ajangteta ogo?? Tsüngrem tenzüker tsübua teli sarasademi ajak akoker tanü alima Rongsen dak temulung lema tebilem!! Tsüngremer sayatenya yipru mepong aser menoknok ajanga meimchir den jembiba mapang lir?? Rev. Imo Aier taküm otzü nungi jangratemtsü aika ajuruogo??

**N.B:**

*America lima Indiana state nungi Dr. Clark aser par kipong Tsüngrem O tulu bener asen limai yokbaji nüklai arutsür??*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir**

### Arogo tasen tenzüksür, Clint Clifton tayimtsü lendong nung asü



Clint Clifton aser pa kinüngtsü Jennifer

**January 14, 2023:** North American Mission Board (NAMB) nungi Arogo tasen tenzüksür mongin, Clint Clifton Brihostibarnü Georgia nung tayimtsü tsükokba lendong nung süogo; pa arrshi küm 43 dang liasü.

NAMB Tir, Kevin Ezel-i, Brihostibar (January 12) nikongdang Clifton north Georgia nung tayimtsü tilaka tsükokba lendong nung süogo, ta metetdaksü.

Tayimtsü nungji Clifton dang liasü aser pa iba tesem nungjisa asü.

"Tsüngremi Clint nem sempet aika moaja liasü. Pa dak pastor melungsentsü liasü aser Arogo tasen tenzüksür mongin ka liasü. Khrista osangtajung ajanga nüburttem atongsü atema pai tejangraba tulu nung inyak. Pai NAMB

nung kanga nendaka inyak aser pa taküm rangben bendanga agütsü. Pa asüba ajanga tapok tulu paaogo," ta Ezel-i metetdaksü.

"Asenoki Clint'er kibong aser par medemertem atema sarasademtsüba den külemi mangyimba mapang nung asenok kati ka melung süngzüksüdi. Ajisüaka tarutsü anogotem nung asenok lenitsü atema asen Kümtetdakba lir," ta paisa metetdaksü.

Clifton aser pa kinüngtsü, Jennifer na 2000 küm kibong aküm aser tena tanur pongu-Noah, Ruthe, Isaiiah, Betchina aser Moses nung sosema lir. Clifton-i New Churches podcast ketdangsüa liasü aser ministry nung menden balala nung inyakba sülen Dumfries nung Pillar Church tenzüksü aser yangji putir inyaka liasü.

Pastor aser kaketzülor, David Platt-i, "Ni Clint akhümtsübubaji o agi rasaa meshitetsü. Pa ya kinüngbu tajung ka, tebu tajung ka, Arogo tasen tenzüksür ka aser medemer ka liasü. Ni aoksar aser jashir. Yimlibilema Clint kinüngtsü aser par chirnurtem atema sarasademjang," ta lemsatop.

NAMB tatong Tir, Trevin Wax-i, "Clint ya sempet aliba lenir ka liasü. Pai Arogo tasen tenzüksürtem sayutsü atema jangra. Pai Kibubar yimli tenzüksü jangra, pastor tem tashi itdaksütsü atema nendaka inyak aser mission mapa atema junga renema aliba lenir ka liasü," ta ashi.

Tawa Instagram post ka ajanga Clifton-i pai kaket tasen ka 'How to Start a Residency' sayatsü, ta sangdonga liasü.

### Khristantemi Chhattisgarh nung tatalokba bushisüngdangtsü akhanger

**January 14, 2023:** India nung Khristan organization aikati Chhattisgarh state kübok district ana nung yimsü dak sendakba rara tatalokba bushisüngdangtsü takhangba agütsüogo; item rara ajanga lisopur Khristan 1,000 dak tema jenshiogo.

January 12, 2023 nü osangbener den jembidang United Christian Front (UCF) Tir, Advocate Justin Pallivadukkal-i, "Onoki state sorkar dang high court nung retired judge ka leniba nung Narayanpur aser Kondagaon district na nung rara adokba tatalokbatem bushisüngdangtsü tuyutsü akhanger," ta metetdaksü.

Paisa, UCF-i Chhattisgarh Governor, Anusuiya Uikey ajanga Centre sorkar danga item tatalokba bushisüngdangtsü atema takhangba agütsüogo, ta metetdaksü.

Pallivadukkal den Ecclesia United Forum chairman, Johnson Tekadyil aser Khristan lenirtemi district anaji semdanga tensa asadangogo.

"Meimchirtemi mamangtetsüsa taochi makai inyakba onoki jangjaogo. Yimdak Khristan yimsü toktsütsü memelunga ajanga tetsürtem lenmang nung mangsa jajadaksü," ta Kerala nung aliba Evangelical Arogo nung lenir, putir Tekadyil-i metetdaksü.

Khristantemi yimdak pei ki toktsür ajentsüsa aküm, aser pei lima nung refugees ama alitsüsa kümogo, ta paisa metetdaksü.

"Yimtsüngtem nung Khristantem meyong ki aser Tenla kitem raksatsü. Kidang parnok meyong osettsüset, kiset shiruru aser jang auyar ao. Parnok yimdak loktiliba nungi jendok ajanga kanga timtemdaksüogo," ta district ana kübok yim aika semdang Khristan team-i metetdaksü.

Item yimtsüngtem nung lisopur Khristantem tasümgang aremtsü atema memela.

Ano yim kar nungbo yimsüsürtemi Khristan team aittsü memela. Tesüiba ita asem tsüngda district ana kübok yim aika nung Khristantem ki raksatsü, Tenla ki raksatsü aser talisa Khristmas mapang nung Khristantem dak azük.

Tesüiba ita asem tsüngda district ana kübok aliba yimtsüngtem nung Khristantem anema inyakba tatalokba 83 liasü, ajisüaka police-i ken o ka danga mebenok.

Lisopur lenirtemi, tribal nisungtemi akhi yimsü toktsür Khristan yimsü magizüksüla ta tuyua lir ajisüaka tribal nisungtemi Khristan yimsü agizükba ajanga parnok anema inyaker.

Advocate Pallivadukkal-i, "Khristantem anema inyakba ya yimsü meyipdaksüba ajanga

masü saka lisopurtem tsüngda telemsa adokdaksütsü atema yimtenren tsütsü nungi asalentong yanglur inyakba lir," ta metetdaksü.

Pai ashiba agi, Khristan yimsü agizüker lisopurtemi süoshi agiba yimya melenshiogo, ki merüka ayur, yi majemer mesüra sen masayar. Item Khristantem jagi pei chirnurtem school-i yokba ajanga sorkar mapa anguba aser taküm jenjang tajungba akümba ajanga tangartemi Khristantem dak tenük yoker.

"Ibaji ajanga yimertem rongnung tenükmerem adok, aser ibaji reprangteta yimtenren party kari election nung tajangzük angutsü atema telemsa adokdaksütsü asoshi inyaker. Tang yimtsüngtem nung loktiliba aser rongsenkettzüng nung ajemdaker telemsa adokogo," ta Advocate Pallivadukkal-i metetdaksü.

District ketdangsertemi item yimtsüngtem nung tesünep alitsü aser jenshia aliba Khristantem yimdaki meyipa arudaksütsü atema inyakdar.

Chhattisgarh Chief Minister, Bhupesh Baghel-ia state nung Khristantem anema inyakertem nem temerenshi agütsütsü, ta nangzükogo.

Chhattisgarh nung nütsüng million 30 shi lir ajisüaka Khristan nütsüngbo shilem 2 shi dang lir.

### ANOGO ABEN TSÜNGREM DEN

#### TSÜNGREMI AJABA TAOCHI

*"Anungji adianutem nenok pei ajaba aser shimtetba shitak metettsi kanga jangrang..." (2 Pet. 1:10)*

Aseni kodaka tali pai kümzükba indang khuli asür patakai asen temenen nungi pilar aser tanela nung tashi itdaksür.

Shirnoki iba taochi khulisütsü Kibuba nungi angu parnoki ajem ajema alitsü makoker.

T. Mapa 4:20 "Onoki angashiba anguba indang meiembibo meliteter" Kechiaser pa dak shiba lir aser pa shiba dak lir iba tashi jagi jembir aser ajungshir. Ibaji pa/la sasa azüoktsü makok kechiaser tajungshibaji Tsüngrem tanela.

Iba Yisu indang khulisüba taochi ya odang masü, yangii taküm rangpen dena lir, taküm, mapang, rongsen, sempet ajak dena khulisütsü Pai Pa chirtem nem agütsü.

Mapang ka tezülur tasütsüsa shirang agi atong. Teimla sama, tejembiba ajak agi anogo mali ta Tsüngrem tenyar ajanga ashi. Joko tezüluri Tsüngrem dang mepishi, Kibuba Ne mulung süang Nai nungdakra ni bener oang ano toktsütsü süra ni anepjang. Idangji Tsüngrem taochiba tekai kongshi aser aneptsü. Tang pa taochi ajanga tanaben Yisu indang khulisur tilatiba saka Pa wadang nung ni lir. Haliluya Pa tenüng sangdi.

### Anogo asemnü CAN mongdang tenzükogo



**Kohima, January 14 (TYO):** Anogo asemnü anepdang 9:30 ako nung Catholic Association of Nagaland (CAN) sentong nung tongti mongdang Hokolbarnü St. Joseph's College (Autonomous) Jakhama nung tenzükogo; iba mongdang ya "Khrista atema kulisür" omen nung ajemdaker agidar.

39buba CAN mongdang tenzükba sentong nung o jembirji Rev. Dn. Parish Chiephobozou nung Dr. Sherman Kuek, OFS putir, Rev. Fr. John S Kavas-i sarasadem aser CAN Tir, Johnny Ruangmei-i lokti pelaa agizükba o jembi.

Kasa sentong nung Ketholezo Michael Kipu-i ketdangsüa asürtem bilemteta akhüm agütsü.

Iba sentong ya Khamkiumong L John leniba nung agia liasü. Southern Angami Catholic Union (SACU)-i ayongzükba mongdang ya Amongnü tembangtsü.

Honibarnü iba sentong ya anepdang 9:30 ako nung tenzükba liasü aser iba sentong nung tongti tejaokerji Principal Secretary to Chief Minister of Nagaland, KD Vizo aser tetushi tejaokerji All India Catholic Union (AICU) Tir, Elias Vas liasü.

Anüngdang 12:00 ako nungi tenzükba sentong nung o jembirji Rev. Dn. Dr. Sherman Kuek, OFS liasü. Pai "Khrista atema kulisür" onük jembi.

Nikongdang 2:30 ako nung tenzükba sentong nung Rtd. IPS John Silshi-i "Loktiliba aser arok ajungtsü" onük jembi liasü.

Nikongdang 4:30 ako nung tenzükba sentong nung CAN advisor aser State Information Commissioner, Nosazol Charles-i "Catholic tesayuba nung ajemdaker shilem agiba" onük jembi.

AO OSHI ANGAZÜKDAK: TANÜ ANGAZÜKTSÜBA OJANG



Onir

(n) o lemtepa anisang (moderator)

\* Teti lokti o lemtepa mapang onir ka shimer.

Onsa

(v) ali anuka tusa (break up ground)

\* Aluyimeri ali onsar metsü proker.

OLONG PAITEP # 6400

15x15 crossword grid with numbers 1-19 indicating starting points for words.

TIPILEN

- 2. Teburtemi tejak nung awaba - (8)
6. T \_ \_ \_ em - (3)
8. Tzük ayudak - (3)
9. Nungdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6399 TELANGZÜBA

TIPILEN :

- 1. Pelaba, 3. Aju, 5. Wat, 6. Lokti, 8. Sala, 10. Atamata, 13. Züin, 14. Okila, 16. Ano, 17. Ama, 18. Nüktzü.

LANGTSÜNGLEN :

- 1. Pentok, 2. Awa, 4. Jakla, 7. Titan, 8. Sütok, 9. Ama, 11. Anaknü, 12. Süttem, 15. Hon.



ALOKBA JEPYA LIA SOBANGBA AJURUR

Sobangba : Aree Temba, kechiba ajeper?
Alokba : Poh poh, ozü tantsü küna ita ka o mejembiteptsü, pei pei molungba inyaksü nangzüktepa agi ni ajeper aja, poh poh.
Sobangba : Waa maja, tanü nungi ita kaji tanzüker asü koda?
Alokba : Masü masü, ita kaji tanü tembanger, poh poh!
Sobangba : Oh Alokba!

~ Lilir : WhatsApp

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

1. Tenüing : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....



Meghalaya nung CM Conrad-i mezüingbuba State University lapoktsüogo



Meghalaya nung CM Conrad-i mezüingbuba State University lapoktsüba noksa angur.

Shillong, January 14, 2023

(Agencies): Meghalaya state ngur küm 50 lir Chief Minister Conrad Sangma-i mezüingbuba State University lapoktsüogo.

January 14, 2023 nü CM Conrad-i Balalgre nung Captain Williamson Sangma University lapoktsüogo.

Meghalaya nung mezüingbuba state university ya mezüingbuba chief minister Captain Williamson Sangma nungtem nung jaloktsü.

Tang tashi Meghalaya nung college ajak North Eastern Hill University (NEHU) nung züingsema lir, ajisüaka state university lapokba ajanga tang nungibo college tem iba university kübok züingsemtsü akok.

"Capt. Williamson Sangma Technical University nung tanga course aser humanities enoksemba ajanga kaketshirtem zünga aotsü lenmang aika angutsü" ta Meghalaya CM-i ashi.

State cabinet-i Capt Williamson Sangma Technical University ya Meghalaya nung mezüingbuba state university asütsü lemtet aser iba ajanga ashishitep aketba Common University Entrance Test (CUET) ajangtetsü.

Meghalaya sorkari December 13, 2022 nü People's Colleges tasen 12 tashi mulunga agizükba aser lapoktsüba osang metetdakja liasü.

December 13 nü state

cabinet-i Thomas Jones Synod College, West Jaiñtia Hills District, Abong Noga College, West Garo Hills District, Khrawsing Christian College, East Khasi Hills District, Ri War College, Loyola College, East Garo Hills, Balawan College, Ri Bhoi District, Mawsynram Border Area College, Selsella College, Seng Khasi College, Shillong, Mendipathar College, North Garo Hills, Sngap Syiem Memorial College, West Khasi Hills aser Tikrillilla College West Garo Hills mulunga agizük.

Külen, cabinet-isa Shillong Government College of Engineering and College of Architecture & Planning, Tura nung sanction posts agizük.

NIA-i Moreh nung nisung 4 apu; Rs 30 lakh angu

Imphal, January 14, 2023

(Agencies): National Investigation Agency (NIA)-i Manipur kübok Moreh jila nung tesem pungu mita aodang nisung pezü apu.

Indo-Myanmar arrtsülen aliba Moreh jila nung terror funding/extortion module dak sendakba nung nisung pezüji apu.

Hokolbar aonung NIA ketdangsürtemi mita aodang Rs 30 lakh den taitüsü aketba kulikakettem aser mobile handset 4 apu.

Par pezüji tanü anüingdang Imphal nung aliba NIA office-i anir aruogo ta ketdangsür kati

ashi. Telungpur teloktemi sen crore aika sarur aser Moreh o Imphal nung aliba terror funding syndicates indang bank account tem nung ayur ta osang angazükba sülen NIA-i bushisüingdang arur.

Moreh aser Imphal nung telungpur teloktem, bank tem aser tanga funding syndicates tsüingda tesentaktep aliba indang bushisüingdang südar, ta NIA ketdangsürisa metetdaksü.

Union Minister of State for Home Affairs Nityanand Rai-i Indo-Myanmar arrtsü nung Indo-Myanmar border indang

tesemtem semdangba sülen iba mapa ya inyakogo.

Union MoS Nityanand Rai-i January 10 aser January 11 anogotem arrtsülen field formations aser forward company operating bases semdanga liasü.

Iba mapang Minister Nityanand-i Indo-Myanmar arrtsü nung atsü yangluba reprangdanga liasü.

Assam Rifles-i Northeast nung telungpur khuret azüokba den arrtsü adena shibelenba maparen mita anükba aser tensa süngjema ayuba atema MoS Nityanand-i tenüingsang agütsü.

Assam-Arunachal arrtsü anasa Gohpur nung lendong atalok

Guwahati, January 14, 2023

(Agencies): January 14 nü Assam-Arunachal Pradesh arrtsülen mejangjatetba nisung kari Gohpur nung ka dak injang khaloktsü.

Iba tatalokba nung Paniram Phanshu ta ser nisung ka yiru. "Tanep 10:30 ako meta Paniram Phanshu-i Arunachal

tsütsü süng abener ao. Onoki injang khaloktsüba osang angashili police dang ashi aser tesem tong ao, saka Arunachal tsütsü alirtemi Phanshu ji mozü kidang anir orr liasü" ta forest ketdangsür kati ashi.

"Onoki tatalokba osang tejangja memetet saka injang khaloktsüdang Assam nung ka yirubaji shitak lir" ta paisa

ashi. Osang angashiba agi Phanshu ji Arunachal tsütsü lia injang khaloktsü. Iba sülen pa Itanagar nung RK Mission Hospital-i anir ao anepalu aser pa temang kanga majung lir.

Paniram Phansu dak injang pungu agi yiru aser onoki iba tatalokba bushisüingdang südar ta Assam Police-i ashi.

Manipur nung Assam Rifles-i crore 2 tema shibelenba apu

Imphal, January 13, 2023

(Agencies): Myanmar nungi Manipur-i truck gari ka nung miima bener süng bener aruba aser ano kozüjang dena ozüingi memelaba osettem abenba apu.

Senapati district kübok Phaibung Khunou yimtsüing nung Somsai battalion sepaitemi pickup gari pungu mita reprangdang ozüing alema shibelenba osettem apu.

Item gari nung kozüjang dena Rs 66.30 lakh alang bena liasü aser garitemji Nagaland kübok Dimapur-i aodang apu.

Iba dak sendakba nung nisung 10 apu aser parnok ajak Phaibung police station ket nung agütsüogo ta Assam Rifles-i metetdaksü.

Ano, Hokolbarnü Ukhrul district nung Assam Rifle indang Shangshak Battalion sepaitemi süng apu.

Truck gari ka süngji Myanmar nungi Manipur-i miima bener aruba liasü aser iba dak sendakba nung nisung ana pua lir.

Parnoki bener aruba süng indang jenjangji Rs 1.44 Crore shi asütsü ta asadangtetogo.

Osang tejangja ka angazükba sülen Assam Rifles sepaitemi Tata truck gari ka soter reprangdang ozüingi memelaba süng bena aliba apu.

# Russia-i kyiv nung tesem balala amak



Ukraine kübok Kryvyi Rihyimi nung Russia nunger missile temi raksatsüba kitem nung teküzmükertem inyaksangshiba noksa nung angur.

**Kyiv, Aenjeti/January 14 (Agencies):** Honibarnü Ukraine yimtiba Kyiv nung air raid siren magütsü tsüngda tesem aika nung bomb apokba ola angashio, ta Associated Press sangdong ka ajanga metetdaksü.

Ukraine tir office Deputy tekolakba Kyrylo Tymoshenko-i Telegram ajanga ashiba agi, linük yimtiba nung infrastructure tongtibangtem missile amshia maneni makdar.

Kyiv mayor Vitali Klitschko-ia, Dniprovskiyi

district nunga bomb apokba ola angashio, ta ashi.

Ajisüaka bomb apokba ola angashiba ya missile tem pokloksüba agi asü air defense system ajanga aji mejangja. Ukraine yimtiba ya New year aonung nungi maka arudar.

Russia defence ministry-i parnoki Ukraine kübok Soledar jila atsüngogo ta ashiba sülen anogo ka lir Ukraine yimtiba maka liasü, ajisüaka Ukraine-i iba osang ya shitak masü aser iba tesem nung maneni radar ta shiogo. Ukraine anütoklen

ajasa taoer dang aliba jila ya linük ana tsüngda raradak teyongtsü kümogo.

Ita aika tamakok nguyonga aruba sülen Soledar jila atsüngba indang Moscow-i sangdongba ya parnok asoshi takok mezüngbuba asütsü. Defence ministry-i January 12 aonung iba jila atsüngba osang sangdonga liasü. Ministry-isa, Soledar atsüngba ajanga iba tesem nung maneni takok ngua rarayonga aotsü asoshi lenmang lapoktsütsü ta ashi.

# Iran-i taoba defence ministry ketdangsür ka tasüba agi merenshi



Ali Reza Akbari

**Tehran, Aenjeti/January 14 (Agencies):** United Kingdom atema itangiter mapa inyakba atema aija Iran-i taoba deputy defence minister tasüba agi merenshiogo.

Judiciary indang official news outlet-i Honibar anepdang sangdong ka ajanga ashiba agi, British-Iranian dual national Alireza Akbari-i, ali anema inyakba aser British intelligence atema itangiter mapa inyaka national security anema inyakba asoshi aletseta südaktsüogo.

Parnokisa, Akbari-i ya taoba mapang itangiter osang agüja linük internal aser external security yirutsüba atema tasüba agi merenshitsu atema obendang agütsür liasü, ta ashi

Parnoki ashiba agi, pa MI-6 nungi training agizük, Iranian intelligence services nungi

jenbotsü atema shell company tem amenok, linük balala den intelligence senden amen, kong Austria aser UAE densema lir aser par linük ashioktsüba atema sempet ama British nunger lisopur jenjang agizükogo.

Britain Ato Kilonser Rishi Sunak-i iba inyakyim ya tasüma it inyakyim ka koba pei nübur indang human rights kecha akümsübu mesüi tazü yimsüsürtemi benoka inyakogo, ta ashi. Britain Foreign Minister James Cleverly-i taoba mapang Akbari tepsettsü atema obendang agütsür aliba ya khen atema sota atatsü ayongzükogo aser ashiba agi, iba ya meimchi taküm kecha hau ta melel yimden yimsüsüsba tsütsü rongmesor inyakba inyakyim ka lir.

United States-ia, pa metepsettsü atema ayongzük

liasü.

Osang ajanga ashiba agi, Akbari-i Iran nunger ketdangsür tejen aika indang osang agüja liasü, kong 2020 küm Tehran anasa jila ka nung tepsetba nuclear scientist Mohsen Fakhrizadeh densema lir. Pa tepsetba ya Iran-i Israel dak tai tongloksüogo.

Iranian judiciary-i ashiba agi, Akbari ya British intelligence den 2004 küm nungi küm pongu tashi inyakba sülen linük toktsür ao. 2009 küm UK-i pa dang Iran toktsür aotsü atema tetuyuba liasü.

Iba sülen küm aika lir Akbari tanaben Iran-i meyipa ao aser pa mapa maneni inyaka aliba mapang apu.

Judiciary-i pa apuba anogo mesangdong, saka osang ajanga ashiba agi, pa 2019 küm pua liasü.

Iba hopta tetenzüklen state meyong IRNA news agency-i, Akbari-i pai aibelen nangzükba indang video ka lemsatepogo, shiba Iran indang security chief aser defence minister (1997 nungi 2005) Ali Shamkhani den pa indang deputy asüba mapang kanga junga sendaktepa liasü.

Akbari'er kinungertemi British media dang pai kecha nunga aibelen mali aser pa Iran nung yimden yimsüsüba tsütsü inyakyim nung asonga akoksaogo, ta ashi

# UN Security Council züngsemtemi Taliban dang tetsürtem nem tenokdangba magütsütsü mepeshi

**Abu Dhabi, Aenjeti/January 14 (Agencies):** United Nations Security Council (UNSC) züngsemtemi Taliban dang Afghanistan nung tetsürtem nem tenokdangba balala agütsüba anentsü mepeshia metetdaksüogo. Taliban-i tetsürtem education aser mapa nung tenokdangba agütsür aliba mapang ka nung tang linüktemi iba tayongzükba agütsüogo.

UNSC züngsem 15 Hokolbarnü jurila senden ka mena liasü. 2021 küm US-i aniba sepaitemi linük toktsür aoba sülen Afghanistan nung sorkar atsünga Taliban-i aniba sorkari telemteba balala agiba sensak asemstü atema United Arab Emirates aser Japan nati mepeshiba sülen iba senden mena liasü.

Sorkar atsüngba sülen Taliban-i tetsürtem secondary aser higher education, public sector mapatem aser park mesemangtsü atema tenokdangba agüja loktilibaren timbaka nung tenokdangba agütsüogo

"Onoki Taliban dang tangsa tang tetsürtem anema jenjang tesashi agir aliba agintsü mepeshir," ta Japan Ambassador Ishikane Kimihiro-i Security Council züngsem 11 tenüng nung jembiba mapang ashi.

Züngsem 11 nung Albania, Brazil, Ecuador, France, Gabon, Japan, Malta, Switzerland, UAE, United Kingdom aser United States densema lir. Parnoki Taliban dang tetsürtem temeden akümsübuttsü, Afghanistan nung yimden yimsüsüba nungi tenzükler rongsenketzüng, aser

education amala loktilibaren ajak nung tetsürtem nem kasa shilem agidaktsütsü ayongzükba liasü.

Parnokisa ketdangsürtem dang, Afghanistan nunger tetsürtem teyari agütsüba telok balala nung minyaksü aser university aser high school tem nung mezüngdaktsütsü atema tenokdangba agütsür aliba ya agintsü khangogo.

International aid teloktem aikati Afghanistan nung tawa tenokdangba balala agütsüba sülen parnok inyakyim anenogo. Taliban sorkari December 24 nü tetsürtem nem tenokdangba balala agütsüba sangdongogo.

"Afghanistan nung tetsürtem indang onük ya Security Council onüktem rongnung tongtibangtiba ka asütsüla," ta Hokolbarnü sangdong ajanga metetdaksü.

United Nations-i ashiba agi, Afghanistan nunger shilem 97 sensak tia nung lir, nütsünyongtsük asemstü nung anabo tangari teyari agütsüba dak dang metaloker alir aser nisung million 20 yatzüra agi meneper lir.

UNICEF Executive Director Catherine Russell-i, teyari agütsüba maparen balala nung tetsürtem nem tenokdangba agütsüba ya tai aser lendong lir, ta ashiba Reuters news agency sangdong ka ajanga metetdaksü.

Taliban-i tetsürtem nem tenokdangba agütsüba ajanga tawa Australia tebur team-ia Afghanistan den March ita cricket asayamung ka asayatsü aliba nung shilem magitsü atema telemteba agia liasü.

# Israel nunger sepaitemi palestine nunger ana tepset



Israel-i amokbanger aliba West Bank kübok Jenin anasa January 14 nü Israel nunger sepaitemi Palestine nunger telungpur ana tepsetba sülen nüburtemi gari teraksa ka asadangba noksa nung angur.

**Jerusalem, Aenjeti/January 14 (Agencies):** Israel nunger sepaitemi Honibarnü West Bank nung Palestine nunger ana tepsetogo. Tenük kuli agütsürtemi ashiba agi Palestine nunger ana ya Israel nunger sepaitemi areshia flashpoint town ka anasa tepset.

Taoba küm Israel kübok yimti balala nung nüburtem yimtung nung amakba sülen Jenin aser iba temeket nung aliba tesemtem military-i kanga sashia meita odor. Tang mepetmesü adoker aliba ajanga US-i yimjung atema sensaksemstü ayongzükba bangdaker aliba ya tenzükshitsu asoshi tetsükdaktsü adokdaktsüogo. Yimjung asoshi sensaksem ya 2014 küm nungi bangdaker lir.

Tenük kuli agütsürtemi ashiba agi, Israel nunger

sepaitem aser telungpurtem tsüngda ayaterem nung khatap aser iba mapang nisung ka yiru. Yirur alisang ya nisung anati gari ka nung anir ajen aser iba tesem nung aliba nüburtem teyari agia yirur alisang ya anizüka toktsüba sülen nisung ana ya maneni ajen saka sepaitemi menepa khaset.

Army otongdar kati ashiba agi, sepaitem dak injang khaloktsba sülen parnoki gari dak injang khalokja liasü. Iba lendong nung Israel nunger ka danga masü. Gari telung nung azü melanger liasü, koba wall ka nung oa tsükoka liasü.

Palestinian militant group Islamic Jihad-i asüsang ana ya parnok züngsem liasü ta nangzükogo. Tenarong kabo Al Aqsa Martyrs' Brigades-ia parnok züngsem ta shiogo.

## Suryakumar & Kishan na Test team nung aniokogo



**New Delhi, Aenjeti/January 14 (Agencies):** Taruba ita Australia den kidang asayatsü aliba test asaya mezüngbuba ana atema Ishan Kishan aser Suryakumar Yadav na tang mezüngbuba Test team nung aniokogo. Hokolbar aonung selector temi Australia den test asaya aser iba sülen New Zealand den ODI aser T20I asayatsü aliba atema asayatem sangdonga liasü. Prithvi Shaw a T20 team nung züngosemogo. Kasa mapang nung Jasprit Bumrah Test team nung anioka mali. Pa tang kanga belema asayatsü asoshi renema mali ta bilemer.

Rishabh Pant yirur masayatetsüsa kümer aliba mapang ka nung selector temi test asaya nung middle order nung attack süa asayatsüpur aginer. Osang ajanga ashiba agi, selector tem aser team management-i Australia den asayaba mapang Ishan middle order batsmen ka ama asayadaksüner, koba Pant melener ka ama asütsü.

"Pant melena wicket keeper ka shimtsü atema kecha tebilemtsü mali. Team nung

Pant ama No. 5 nung asaya melenshidaksütetsüpur ka nungdaker. Ibayongji Ishan shimogo. Suryakumar-a option ka asütsü. Tena ya melentepba asayatsü imlar," ta BCCI source kati TOI dang ashi.

Kasa mapang nung India 'A' team nungi junga masayatetba sülen Sarfaraz Khan team nung meshim.

Ravindra Jadeja shiba temekok yiruba ajanga taoba Küm September ita nung tang tashi khen danga asaya mali pa Test atema shimogo, ajisüaka pa asayatetsüsa temang anema lir ta jangjaba sülenang asayadaksütsü.

"Jadeja dang domestic asaya ka danga asayatsü asüngdangogo. Pa temang anema kümer lira middel order nung left-hander ka nungdaka aliba tebilemtsü bentetsü aser India-i bowler pongu asayatetsü," ta source-isa ashi.

Kasa mapang nung KL Rahul aser Axar Patel nati NZ den asayatsü aliba asayamung nung shilem magitsü atema telemtetba agiogo.

Australia mezüngbuba Test asaya ana atema asayatem:

Rohit Sharma (captain), KL Rahul (vice-captain), Shubman Gill, Cheteshwar Pujara, Virat Kohli, Shreyas Iyer, KS Bharat (wk), Ishan Kishan (wk), R. Ashwin, Axar Patel, Kuldeep Yadav, Ravindra Jadeja, Mohd. Shami, Mohd. Siraj, Umesh Yadav, Jaydev Unadkat, Suryakumar Yadav.

New Zealand den ODI atema asayatem: Rohit Sharma (captain), Shubman Gill, Ishan Kishan (wk), Virat Kohli, Shreyas Iyer, Suryakumar Yadav, KS Bharat (wk), Hardik Pandya (vice-captain), Washington Sundar, Shahbaz Ahmed, Shardul Thakur, Yuzvendra Chahal, Kuldeep Yadav, Mohd. Shami, Mohd. Siraj, Umran Malik.

New Zealand den T20I atema asayatem: Hardik Pandya (captain), Suryakumar Yadav (vice-captain), Ishan Kishan (wk), Ruturaj Gaikwad, Shubman Gill, Deepak Hooda, Rahul Tripathi, Jitesh Sharma (wk), Washington Sundar, Kuldeep Yadav, Yuzvendra Chahal, Arshdeep Singh, Umran Malik, Shivam Mavi, Prithvi Shaw, Mukesh Kumar.

## Yuki aser Saki nati Bangkok Open Challenger title benogo



**Aenjeti/January 14, 2023 (Agencies):** Top-seeded India nung tarap Yuki Bhambhani aser Saketh Myneni nati Bangkok Open kokogo. Tenati Honibarnü final asaya nung Christopher Rungkat adser Akira Santillan na koka liasü. Iba asayamung akokba densema tenati ATP Challenger Tour trokbuba kokogo.

Final tenetbuba külemi

asayaba mapang India nung tarap yagi Indonesia aser Australia nung tarap ya 2-6 7-6(7) 14-12 agi koka liasü. Final asaya ya ghonda ka ser minute 50 asaya liasü.

Yuki aser Saketh na ya taoba küm nungiang külemi asayar aser taoba küm April nungi October ita tsüngda Challenger final trok-i ai aser pongu koka liasü.

Honibarnü takok anguba sülen arishi küm 28 tain Yuki ya tarep asaya nung jentang 90bubai atutsü aser arishi küm 35 tain Myneni ya ATP doubles chart nung jentang 74bubai atutsü.

Tena atema taruba asayamungji Australian Open asütsü. Taküm küm atema mezüngbuba Grand Slam nung asayatsü atema tena nem wild card entry ka agüja liasü.

## Badosa, Tomljanovic na Australian Open nung masayatetsü

**Aenjeti/January 14, 2023 (Agencies):** Paula Badosa tetsüng tachichilen tepi yiruba sülen Australian Open nung masayatetsüsa kümogo.

Honibarnü Adelaide nung warm-up asayamung ka nung shilem agiba mapang world number 11 asayar ya yirua liasü.

Spain tsür Badosa, shibai taoba küm Melbourne Park nung semi-final tonga asayaogo, la Hokolbarnü Adelaide International 2 semi-final nung Daria Kasatkina den asayatsü liasü saka masayatsü asoshi telemtetba agi, kechiyong la taoba round nung yirua liasü.

"Osang tamajung... Adelaide nung quarter-final asayaba mapang ni yiru aser result anguba sülen ni hopta ishika masayatetsüsa kümogo," ta Badosa-i tweet asü.

"Taküm Australia Open nung masayatetsüsa akümba

atema mepelar. Ni takokba tashi takaratiba nung asaya tenzüksü atema meranga inyaktüsü," ta lai ashi.

Kasa mapang nung Ajla Tomljanovic-a taküm küm atema mezüngbuba Grand Slam nung masayatetsüsa kümogo, koba Honibarnü tenzüksü. La season-opening United Cup mixed team asayamung nung asayaba mapang temekok yiruba sülen masayatetsüsa kümogo.

"Ni takaratiba nung tanepstü angutsü atema takokba tashi merandangogo, saka yirur aliba anetsü asoshi mapang atsüra aküm aser temaba jentang nung noklang nung noklang renemer tokteptsü mekoki kümogo," ta Tomljanovic-i tweet asü.

"Iba telemtetba agitsü temela masü asü, saka temang anepalutsü nungdaker asünung agiogo," ta laisa ashi.

## Man United-i Weghorst den tenangzüktepba yanglu

**Aenjeti/January 14, 2023 (Agencies):** Manchester United-i Netherland nung striker Wout Weghorst Burnley nungi loan nung anir aruogo. Pa iba season tatembang tashi asayatsü. Cristiano Ronaldo-i club toktsüba sülen pa melentsü atema tang Weghorst den tenangzüktepba yangluogo.

November ita Ronaldo-i club toktsüba sülen attack tali tashi itshitsü atema United manager Erik ten Hag mulungteter lir.

Weghorst shiba Turkish club Besiktas nung loan nung oa liasü, pa Honibar aonung English Premier League nung Manchester City den asayatsü aliba asaya nung shilem magitettsü, kechiyong pa mapang shidak nung register masü.

"Wout-i European league aika nung seplasepshi mesüi goal idakja asaya aruogo, aser pa anisemba ajanga team tashi taitba akümtsü," ta United football director John Murtough-i Hokolbarnü ashi.

Ronaldo melena Weghorst shimba ya mimlai aliba jentang ka agiba lir. Taoba küm November ita Piers Morgan den sensaksema mapang Ronaldo-i Ten Hag aser club kibur aitsüba sülen pa den tenangzüktepba yanglur aliba tembangtsü.

Iba sülen Ronaldo Saudi Arabian club Al Nassr den tenangzüktepba ka yangluogo.

"Manchester United nung adenba ya maongka tajung ka ama bilemer," ta Weghorst-i ashi.

"Ni taoba mapang iba club den asayaogo aser tang iba team nungi asayatsü maongka

anguba atema kanga pelar. Erik ten Hag kübok United pur renloka aoba ni nguogo aser club nungi asayatsü yongya atar.

"Taruba ita ishika nung kechisa ataloktsü memetet saka ni akokba tashi club atema bendanga agüja asayatsü," ta paisa ashi.

Ten Hag-i Champions League atema qualify asütsü atema team attack tashi taitba kuma yanglushitsü asoshi temelener ka bener arutsü tejangraba liasü.

Ronaldo-i club toktsüba sülen team nung Anthony Martial aser Marcus Rashford ta striker ana dang anunger liasü.

Weghorst, Qatar World Cup nung Netherlands team nung asayaogo aser pai Argentina den quarter final asayaba mapang goal ana idakja liasü. Pai goal idaktsüba ajanga extra time aser penalties asayatsüsa aküm, koba Argentina-i goal 4-3 agi koka liasü.

Arishi küm 30 tain Weghorst-i iba season Besiktas atema goal ti idaktsüogo, kong taoba asaya asem nung goal ana idaktsüba densema lir.

Weghorst ya German club Wolfsburg nung taoba Küm January ita USD 15 million yong Burnley nung arua aden. Pai Burnley nungi 20 ben asayaba mapang goal ana dang idaktsü aser parnok PL nungi relegat asü.

United-i, Cody Gakpo alitsü asoshi merandang ajisüaka pa Liverpool nungang oa aden. Kasa mapang nung United midfielder Donny van de Beek temekok yiruba sülen season tepeyong masayatetsüsa kümogo.

## BILEMDANGANG

"Alirongsen aser tashi agi nü taküm malangzükttettsü." "